

BILTEN

br. 10

Februar 2015.

Informativno glasilo



”Kroz Bilten razmjenjujemo ideje za jačanje naše Zajednice, očuvanja jezika, identiteta ali i naše historije! Jer gdje god mi živjeli moramo znati ko smo, šta smo i odakle dolazimo! A Bilten nam je najveća podrška u tome!” Samir, Gislaved



**SRETAN 1. MART
DAN
NEZAVISNOSTI
BIH**

Uvodnik za 10.broj Biltena



„O vjernici, ako vam neki smutljivac donese kakvu vijest, dobro je provjerite, da u neznanju nekom zlo ne učinite, pa da se zbog onoga što ste učinili kajete.“

(Sura El-Hudžurat, 6. ajet)

Živimo u „informacionoj epohi“. Informacije stižu i prestižu jedna drugu. Ono što je samo prije nekoliko trenutaka bila ekskluzivna novost, biva još brže potisnuto novim vijestima.

Nema vremena da se sve popamti, a kamoli provjeri i analizira. I zbog toga je toliko zla na sve strane.

Nažalost, i mi, u našim privatnim životima, ponašamo se na isti način i, naravno, *činimo zlo* jedni drugima, a i sebi samima.

Zbog toga se gornjem ajetu moramo iznova vraćati. I ne samo ovom ajetu. Cijela sura

El-Hudžurat morala bi biti kodeks našeg ponašanja prema Allahu, dž.š., drugima, ali i prema sebi samima.

P.S.

Ovih dana navrašava se godina dana od pokretanja našeg Biltena. Ovo je deseti broj. Stižu nam pohvale sa svih strana. Bilten je našao svoje mjesto. Zamisao da što više znamo jedni o drugima svakako je ispunjena, međutim, stiče se dojam da neki džemati nisu iskoristili priliku prezentiranja svojih aktivnosti. Kao da se plašimo sa drugima podijeliti svoje uspjehe. Ovo zvuči još apsurdnije ako znamo da se ljudi danas na sve načine bore da informacija o njima stigne što dalje i što brže. Nerijetko plaćaju za to.

Zbog toga vas još jednom pozivamo da pišete o vašim aktivnostima. Što se budemo bolje poznavali, sve ćemo se više uvažavati, pa i voljeti, a i zla, o kojem je bilo govora na početku ovog Uvodnika, bit će manje.

Idriz-ef. Karaman

Glavni urednik

Idriz-ef. Karaman

Izvršni urednik

Almedin-ef. Spahić

Redakcija

Savjet glavnog imama:

Smajo-ef. Šahat

Nezir-ef. Špiodić

Elvedin-ef. Bešlija

Saradnici u ovom broju:

Jasmin Dervišević

Mustafa-ef. Šetkić



SADRŽAJ

Impresum	2
Uvodnik	
Bilten u Zajednici	3
Sjednica IO IZBUŠ-a	4
Intervju: Haris Delić	5
Projekcija filma	7
Džemat u Štokholmu u vakufskom objektu	8
Mekteb u Skene	9
Hutba	10
Sastanak glavnih ima- ma iz dijaspore	13
Mekkanski proglas	14

Bilten u našoj Zajednici



Poštovani Uredniče, redakcijo i saradnici Informativnog glasila IZBUŠ-a, es-selamu alejkum.

Želim vam uputiti srdačnu čestitku u povodu izdavanja 10. jubilarnog broja Biltena. Čast mi je i zadovoljstvo što sam imala priliku dobivati vaš Bilten, te na taj način biti redovno i bliže upoznata sa aktivnostima i radom mnogih džemata u našoj Islamskoj zajednici, što nam je bilo onemogućeno ili teško dostupno ranije. Ovom prilikom, također, želim pohvaliti bogat sadržaj dosadašnjih izdanja, kao i ažurnost redakcije, sa nadom da će naredni brojevi biti još bogatiji i sadržajniji, te da će se uključiti i džemati koji do danas nisu bili aktivni. Sa nadom da ćete održati kontinuitet i ići ka cilju da ovaj Bilten bude glasilo broj 1 Islamske zajednice, mahsuz vas selamim.

S. Š., Helsingborg

Bilten je nešto što je nedostajalo nama muslimanima da više budemo upoznati s radom IZ. A i da budemo upoznati sa radom drugih džemata! Jer kroz Bilten razmjenjujemo ideje za jačanje naše IZ, očuvanja jezika, identiteta ali i naše historije! Jer gdje god mi živjeli moramo znati ko smo, šta smo i odakle dolazimo! A Bilten nam je najveća podrška u tome!

Samir Okanovic, Gislaved



Održana sjednica IO IZB u Švedskoj



“Izvršni odbor je, također, donio odluku da se uputi poziv reisu-l-ulemi Husein-ef. Kavazoviću da u ovoj godini posjeti Islamsku zajednicu Bošnjaka u Švedskoj.”

U subotu, 14. februara 2015. godine, u Örebro je održana sjednica Izvršnog odbora Islamske zajednice Bošnjaka u Švedskoj. Na sjednici je usvojen radni materijal za predstojeću Skupštinu, te dogovorene druge pojedinosti oko njene pripreme i održavanja.

Izvršni odbor je donio odluku da preseli kancelariju sekretarijata IZBUŠ u druge funkcionalnije prostorije.

Glavni imam je zadužen da na sastanku glavnih imama krajem februara u Sarajevu iznese problem nepriznavanja članarine sa kojim se susreću naši članovi u nekim medžlisima u Bosni i Hercegovini.

Osim toga, zatraženo je da Sabor Islamske zajednice u BiH što prije usvoji dokument o organiziranju Islamske zajednice u dijaspori, čime bi se obezbijedili uvjeti za donošenje novog Statuta i drugih normativnih akata krovnih organizacija i džemata u dijaspori.

Izvršni odbor je, također, donio odluku da se uputi poziv reisu-l-ulemi Husein-ef. Kavazoviću da u ovoj godini posjeti Islamsku zajednicu Bošnjaka u Švedskoj.

Nakon sjednice članovi Izvršnog odbora obišli su radove na budućem Islamskom kulturnom centru u ovom gradu, a onda održali zajednički sastanak sa Izvršnim odborom džemata. Na sastanku je data podrška aktivnostima džemata, te diskutirano o problemima sa kojim se džemat susreće u svom radu.

Intervju sa predsjednikom BEMUF-a Harisom Delićem



Haris Delić,
Predsjednik Bemuf-a i student
medicine

U ovom broju Biltena IZB u Švedskoj objavljujemo intervju sa predsjednikom BEMUF-a, muslimanskog omladinskog saveza u Švedskoj.

Čestitamo na ponovnom izboru za predsjednika BEMUF-a! Po čemu je danas BEMUF prepoznatljiv u švedskom društvu?

Haris Delić: Hvala lijepo na čestitkama! Izuzetno mi je drago što mi je omladina pokazala povjerenje da još jednu godinu vodim Bemuf, ponos naše Zajednice!

Bemuf ove godine puni 18 godina postojanja, pa kako to kaže uvaženi glavni imam Idriz ef. Karaman, Bemuf ove godine postaje punoljetan. Sve ove godine, Bemuf je uvijek težio ka tome da okuplja našu bošnjačku omladinu na hajr, da pruži priliku i mogućnost našoj omladini da se upozna i da se aktiviraju u radu za dobro Zajednice, za dobro Bošnjaka i za dobro muslimana na ovom području. Ovaj posao je, između ostalog, izrodio istaknute ličnosti u švedskom društvu kao što je gospodin Elvir Gigović, koji je trenutno predsjednik SMR-a (Švedskog Muslimanskog Savjeta) i koji jako lijepo i mudro predstavlja interes muslimana u društvu, kako u toj organizaciji tako i javno u raznim medijskim nastupima.

Bemuf također prikazuje muslimanske vrijednosti u društvu tako što nudi svojim članovima i omladincima alternativna rješenja i alternativne načine druženja. To su druženja bez alkohola i bez droge, na kojima se ponosno može reći da je omladina u takvom okruženju sigurna i u lijepom islamskom ambijentu.

Kakvi su planovi i zadaci BEMUF-a u 2015.god.?

Haris Delić: Bemuf je na svojoj redovnoj godišnjoj Skupštini u Jönköpingu 28. februara 2015. godine usvojio dokument pod nazivom: "Strategija za podizanje organizacionog nivoa lokalnih organizacija Bemufa". Taj dokument sačinjava strategiju koja se sastoji od niza oraganizacionih promjena u oblastima organizacije, statuta, ekonomije i vizije budućeg razvoja lokalnih organizacija Bemufa. Ovaj će se dokument, uz Božiju pomoć, prezentirati na Skupštini Islamske zajednice 21. marta 2015. godine gdje će se dati prilika predstavnicima džemata IZBUŠ-a da se bolje upoznaju sa planom rada i vizijama Bemufa.

Što se tiče naših redovnih aktivnosti, prošle godine je oboren rekord što se tiče posjetioca na Zimskom Susretu na kojem je bilo preko 100 omladinaca, a i na Ljetnom Susretu je takodjer bio veliki broj učesnika. Ove godine se nadamo još većem odzivu tako da smo već sada iznajmili kompletan kamp u Sparrevikenu kod Lysekila 5.-7. juna 2015. godine i rezervisali puni kapacitet tog objekta sa 122 mjesta. Ovom prilikom i pozivam sve čitaoce da više informacija o ljetnom susretu, te našim drugim aktivnostima mogu naći na našoj internet stranici www.bemuf.org.

Bemuf će također ove godine pokušati da pojača saradnju sa NBV-om, te da proširi svoje aktivnosti što se tiče educiranja našeg članstva izradom edukativnih materijala na teme vjera, jezik i ovisnost. Ovi materijali su namijenjeni da se obrađuju na druženjima naših omladinaca i nadamo se da će im to biti zanimljivo i od koristi.

Bemuf je tokom prošle godine oborio i rekord što se tiče broja članova u organizaciji. Planiramo i ove godine da povećamo broj članova, te zato i ovom prilikom pozivam sve čitaoce da promoviraju učlanjenje u Bemuf naše djece i omladine starosne dobi **6-27** godina. Učlanjenje se najjednostavnije može izvršiti preko naše internet stranice.

Ove godine sam mišljenja da se od Bemufa može očekivati mnogo hajra, ali naravno treba nam i pomoć da postignemo sve ove ambiciozne ciljeve. Zato toplo preporučujem svim članovima Islamske zajednice da pomognu Bemufu. Lijep primjer je izjava novoizabranog predsjednika Džemata Göteborg koji je svoju spremnost da pomogne Bemufu pokazao svojom izjavom: "Šta to mi možemo učiniti za omladinu?". Bemufu je za potpuni uspjeh i dalji razvoj potreban svaki vid angažmana i podrške, a posebna podrška omladini je potrebna od strane vlastitih džemata.

Koliko BEMUF uspjeva utjecati na religioznost mladih u švedskom društvu?

Haris Delić: Hvala Allahu koji nam je dao priliku da se možemo posvetiti Njegovoj Vjeri pa i na ovaj način kroz našu organizaciju koja zaista, kako to stoji u Kur'anu "poziva na dobro, a odvraća od zla". Bemuf se uvijek trudio da nudi alternative za omladinu i da im probudi razmišljanja o vjeri i o islamskim vrijednostima. Prema nekim podacima, druženja Bemufa su pomogla sklapanju više od **300** islamskih brakova, što govori o svijesti koja se počinje buditi kod naše omladine. Isto tako, lijepo je vidjeti svijetle primjere muslimanske omladine koja studira na visokim školama, postižu zanimljive i značajne uspjehe u Švedskoj, ali i naše najmlađe članove koji su ako Bog da budućnost Bemufa, a kasnije i Islamske zajednice. Ovo je zaista jedno veliko pozitivno svjetlo i molim Allaha dž.š. da naša bošnjačka omladina bude uzor drugoj omladini i što se tiče vjere i što se tiče i ovodunjalučkih postignuća.

Na kraju, želio bih se zahvaliti redakciji Biltena, Savjetu glavnog imama, na prilici da se obratim čitaocima i nadam se da će se još više čuti i znati za Bemuf. Nastavljamo sa našim radom, baš kao što to kaže slogan Bemufa: "Vjerom u budućnost"!

Projekcija filma “Imami šehidi” u Landskruni

“Projekciji je prisustvovalo oko dvadesetak džematlija, a nakon filma koji je završio fatihom o šehidima imamima, veliki broj prisutnih je i kupio ovaj primjerak filma, a na mnogima su se mogli vidjeti i tragovi suza nakon emotivnih sjećanja i filmskih priča koje su pristune podsjetile na jedan od najtežih perioda u dugoj historiji Bosne.”




Foto: Arhiva

U subotu 21. februara 2015. godine, u džematu Landskruna održana je projekcija filma “Imami šehidi”. Ovo je bila jedna od desetak dosad održanih projekcija ovog filma u Švedskoj.

Projekciji je prisustvovalo oko dvadesetak džematlija, a nakon filma koji je završio fatihom o šehidima imamima, veliki broj prisutnih je i kupio ovaj primjerak filma, a na mnogima su se mogli vidjeti i tragovi suza nakon emotivnih sjećanja i filmskih priča koje su pristune podsjetile na jedan od najtežih perioda u dugoj historiji Bosne.

Film je prikazan u susret 1. martu, Danu nezavisnosti BiH, a projekciji je pored domaćina Nesib-ef. Makića, prisustvovao i Nezir-ef. Špodić, predsjednik Udruženja ilmije u Švedskoj.

Nakon projekcije i jacije-namaza nastavljen je muhabet s džematlijama uz konstataciju da bi danas mogli dati puno veći doprinos borbi i očuvanju vrijednosti za koje su oni i svoje živote dali.

Džemat Štokholm preselio u prostorije nove džamije



“Poslije zahvale dragom Allahu dž.š., najiskrenije se zahvaljujemo svima ostalima koji su doprinijeli da prođemo kroz ovaj proces. Posebno se zahvaljujemo nosiocima Fonda vakuf, a naravno, i svim ostalim članovima, simpatizerima, džematima naše Savezne zajednice kao i samoj Zajednici, komšijskim i drugim džematima a posebnu Rijasetu i molimo Allaha dž.š. da ih obilno nagradi i nafaku im uveća.“

Klanjanjem prve džume namaza džemat Stockholm je hajrili obilježio preseljenje u novu džamiju. Prvu džumu namaz i nadahnuto predavanje obavio je Mustafa-ef. Šetkić, džumanski Jasin-i-šerif lijepim glasom proučio je Ibrahim-ef. Šetkić a prvi džumanski ezan proučio je h.Suad Golić. U svom džumanskom obraćanju Mustafa-ef., predsjednik UO BIZ Stockholm, je pozvao sve one koji se budu okupljali u ovoj Božijoj kući na iskrenost i jedinstvo. Džumi namazu je prisustvovalo nepunih 200 klanjača.

Inače, članovima ovog džemata ovaj petak nije bila prva prilika da ibadete u svojoj dugo očekivanoj novoj džamiji. Na sami dan potpisivanja ugovora, 02.01.2015., isto u petak, poslije džume namaza ovdje su se okupili vjernici u želji da, klanjajući dva rekata tehijetul-mesdžida, budu među prvima koji su ibadetili u novoj džamiji. Taj isti kalendarski dan je bio mubarek i po tome što je od akšam-namaza nastupio 12. Rebiul evvel, Mevlud Poslanika Muhammeda a.s., a koji je već sutradan u subotu, 03.02.2015. obilježen u novoj džamiji. Prekosutra, nedjelja, 04.01. je u novoj džamiji održan i poseban mekteb da bi i najmlađi sa svojim roditeljima imali priliku se odmah upoznati sa novom džamijom. Time je okončano to trodnevno druženje i upoznavanje sa novom džamijom da bi nastupio period od nepuna dva mjeseca pripreme za prelazak i vršenja najnužnijih korekcija da bi se u ovaj petak preseljenje otpočelo mubarek džuma namazom.

Poslije zahvale dragom Allahu dž.š., najiskrenije se zahvaljujemo svima ostalima koji su doprinijeli da prođemo kroz ovaj proces. Posebno se zahvaljujemo nosiocima Fonda vakuf, a naravno, i svim ostalim članovima, simpatizerima, džematima naše Savezne zajednice kao i samoj Zajednici, komšijskim i drugim džematima a posebnu Rijasetu i molimo Allaha dž.š. da ih obilno nagradi i nafaku im uveća.

Također očekujemo od sviju da i dalje doprinose ovome procesu koji nije završen i pred nama su uređenja i adaptacije koja bi isto tako mogla zahtijevati velika ulaganja.

A od Allaha molimo ono najvažnije a to je da bude sa nama i našim djelima zadovoljan. Amin.

Džemat Borås: Mektebski punkt Skene

U okviru Bošnjačke islamske zajednice Borås pored mektebske nastave u samom Boråsu nastava se izvodi i u mjestu Skene koje teritorijalno pripada ovom džematu. Mjesta Skene i Kinna udaljeni su od Boråsa neki 40-ak kilometara. Kada smo 2012. godine započeli sa mektebskom nastavom trebalo je dosta truda i rada prije svega djece i roditelja da bi smo evo sada zakoračili u treću godinu ovog izuzetno važnog projekta. Pored spremnosti džemata Borås da realizuje iskazanu želju naših džematlija koji žive na ovom prostoru, nesebičnu ulogu odigralo je i Bosansko kulturno udruženje „Krin“ Skene. Od samoga početka pružili su nam nesebičnu podršku i dobrodošlicu te dali jednu prostoriju za mektebske namjene. Krajem 2014. godine Udruženje je promijenilo svoje prostorije a samim tim i mekteb je dobio novu prostoriju, koja sad ispunjava sve uvjete za još kavlitetniji rad.

Ono što ovaj mektebski punkt čini izuzetno zanimljivim jeste činjenica da u mekteb dolaze čitave porodice. Prvi sat nastave je za djecu zatim omladinu a onda za roditelje. Svi su zajednički u mektebu i imaju želju da uče o Allahovoj vjeri. Oni su realizatori poznatog islamskog stanovišta da je čovjek dužan tražiti znanje ne osvrćući se na svoje godine. Možemo zamisliti kako je lijepa harmonija u njihovim domovima kada zajedno uče i stiču nova znanja, to prije svega djeci daje veći stimulans za učenje jer u svojim roditeljima vide one koji žude za znanjem.

U okviru ovog mektebskog punkta djeluje i aktiv žena koje imaju svoja redovna druženja i predavanja, koja vodi muallima Amra Bešlija. Na svim našim centralnim programima i svečanostima u Boråsu učešće uzima i mektebski hor iz Skenea.

Na kraju podsjećemo na jednu lijepu Kur' ansku poruku kojom nas Svevišnji ohrabruje i podstiče na trud i zalaganje, a kod Njega su konačni rezultati. I reci : "Trudite se! Allah će trud vaš vidjeti, a i Poslanik Njegov i vjernici, i vi ćete biti vraćeni onome koji zna nevidljivi i vidljivi svijet, pa će vas o onome što ste radili obavijestiti. (Tevba, 105)"

E.B.

**“I reci : "Trudite se!
Allah će trud vaš
vidjeti, a i Poslanik
Njegov i vjernici, i vi
ćete biti vraćeni
onome koji zna
nevidljivi i vidljivi
svijet, pa će vas o
onome što ste radili
obavijestiti.
(Tevba, 105)”**



Hutba: HUDHUD JE POUKA SVIM GENERACIJAMA



Hatib: Nezir-ef. Špiodić
džemat Helsingborg

**Kur'an na mnogo
mjestu govori o
zajednici, džematu, a
u dva jako lijepa
kazivanja Allah, dž.š.,
nam nam oslikava
važnost brige za
Zajednicu.**

Zahvala Allahu pripada, Gospodaru svega stvorenog, Vladaru Dana sudnjeg. Na Poslanika salavate donosimo, njegov ehli-bejt, časne ashabe, naše šehide i sve sljedbenike dina i sunneta.

Draga braćo, poštovane sestre, cijenjena omladino!

Allah, dž.š., od čovjeka traži odgovornost za svoj život i svoja djela. Čovjek će polagati sam račun pred Gospodarom svega, pa stoga nas Allah poziva i kaže: "O vi koji vjerujete, brinite se o sebi..." (El-Maida, 105) Uzvišeni nas poziva da razmišljamo o sebi, svojim postupcima, svom životnom putu, da se preispitujemo.

„Obračunavajte se sa sobom prije nego vam se bude obračunavalo. Preispitajte sebe, prije nego budete ispitivani. Izvagajte svoja djela, prije nego sto vam bude vagano!“ – savjetovao je hazreti Omer.

Kada je saznao za spisak munafika, veliki hazreti Omer, čovjek kojem je Džennet bio obećan još na ovom svijetu, upitao je Resulullaha: "O Allahov poslanice, mene samo zanima jesam li ja tu? Ima li Omera na spisku munafika?!" Koji primjer brige o sebi i svojim djelima! Mnogi bi od nas danas pitali ima li na tom spisku mog radnog kolege, efendije, muftije, rođaka, onog iz prvog safa i td., a na sebe zaboravljamo.

Prenosi se da bi veliki učenjak i pobožnjak Malik ibn Enes bježao iz Medine kada zagrmi. Pitaju ga zašto bježi? „Strah me da Allah ne kazni ovaj grad zbog mojih grijeha“, odgovara ovaj velikan!

Dalje, lingvističari kažu da riječ insan, u prijevodu čovjek, ima dva značenja: *نسي nesije* - što znači zaboraviti i *انس enese* - što znači druželjubiv. Ova druga riječ nam govori da je čovjek zapravo druželjubivo biće i da treba pripadati određenoj zajednici (džematu) da bi mogao funkcionisati. U tom kontekstu, Gospodar svjetova od nas traži i društvenu odgovornost, tj. da svako od nas, u skladu sa svojim položajem i mogućnostima u društvu, brine i pomaže zajednicu.

Kur'an na mnogo mjestu govori o zajednici, džematu, a u dva jako lijepa kazivanja Allah, dž.š., nam nam oslikava važnost brige za Zajednicu.

Naime, vidjevši da je Sulejman, a.s., postrojio svoju vojsku sačinjenu od džina, ljudi i ptica, sve četa do čete, kako nas Gospodar obavještava, jedan mrav (mravica, ar. *nemletun* - ženka) odlučila je ostati nesebična, smatrala je sebe dijelom džemata, odlučila je pokazati brigu za drugima, za zajednicom, za džematom, pa se obraća mravima:

“O mravi, ulazite u stanove svoje, da vas ne izgazi Sulejman i vojske njegove, a da to i ne primijete!” (En-Neml, 18)

Draga braćo!

”Ko radi neki posao koji doprinosi jedinstvu muslimana i u tome uspije – Allah, dž. š., će mu to primiti, a ako pogriješi – Allah, dž. š., će mu oprostiti. Ko pak radi neki posao, iako je pozitivan, sa kojim će razjediniti muslimane – Allah, dž.š., mu to neće primiti i bit će kažnjen.”

Razmislimo o sljedećim porukama: Ovaj mrav/mravica mogao je da se sam spasi, skloni na sigurno mjesto, sebe i svoje bližnje, međutim nije to učinio, već je u njemu proradila svijest o džematu, briga za zajednicom, pa je krenuo da ih spasi. Vjernik ne bi smio biti pasivan prema zajednici i društvu. Muhammed, alejhi selam, nas uči da je nivo našeg društvenog angažmana za opće ciljeve zajednice, zapravo, mjerilo naše vjere, pa kaže: „Najbolji čovjek je onaj ko je najkorisniji svojoj zajednici.”

Druga poruka bi bila nama danas, muslimanima protiv kojih se se digle ove ili one vojske, to je poruka nama Bošnjacima, kao malom narodu, da uđemo u svoje nastambe, a naše nastambe su naše institucije, džemati, mesdžidi, naša zajednica! To su mjesta gdje trebamo čuvati svoju vjeru, identitet, jezik, tradiciju, odgajati svoju djecu, jer ako to ne budemo uradili, kao što reče onaj mrav, mogu nas zgaziti raznorazne vojske, ove ili one vrste, koje napadaju nas, naše porodice, djecu, omladinu i gdje vrlo lahko sve svoje vrijednosti možemo izgubiti! U drugom slučaju Allah, dž.š., nam navodi primjer hudhuda. Hudhud (pupavac) je mala ptičica, dužine oko 25 cm, ali je zavrijedila da bude spomenuta u Kur'anu i da sjećanje na nju živi do Sudnjeg dana.

Zašto? Zato jer je, kako nas Allah Uzvišeni obavještava u suri En-Neml, odlučila dati svoj doprinos širenju islama, širenju Božije riječi. Nije hudhud ostao sebičan, pokazao je brigu za druge; nije hudhud čekao ni da mu Sulejman, alejhi selam, naredi kako da doprinese. Čak, hudhud rizikuje i svoj život odlazeći par stotina kilometara daleko, ali je htio pokazati da je na strani onih koji brinu za vjeru i doprinose zajednici muslimana. Zato će se hudhud spominjati do Sudnjeg dana. Naš učitelj Muhammed, alejhi selam nas je poticao na brigu o zajednici, njenom jedinstvu i inicijativi ka njenim uspjesima.

“Allahova ruka je sa džematom/zajednicom, to je milost koju Allah spušta!” – savjetovao nas je Muhammed, alejhi selam. Jedne druge prilike kazao je Resulullah, a.s., a taj hadis bilježi imam Taberi:

”Ko radi neki posao koji doprinosi jedinstvu muslimana i u tome uspije – Allah, dž. š., će mu to primiti, a ako pogriješi – Allah, dž. š., će mu oprostiti. Ko pak radi neki posao, iako je pozitivan, sa kojim će razjediniti muslimane – Allah, dž.š., mu to neće primiti i bit će kažnjen.”

Kada govorimo o samoinicijativi spomenimo i riječi Poslanika islama, alejhisselam, u kojoj kaže: “Ko u islamu uvede neku lijepu praksu imat će nagradu za to što je uradio i za sve one koji ga budu slijedili, a da se njima ne umanji njihova nagrada...” (Muslim)

Stoga, poput hudhuda i mrava iz kur'anskog kazivanja, poput nesebičnosti ashaba i ashabijki, poput požrtvovanosti naših majki, vrijednih džematlija i naših šehida, požrtvovanosti naših znamenitih bosanskih alima i imama, koji su dali svoj doprinos zajednici muslimana;


budimo i mi na njihovoj stazi. Svojim doprinosom pomažimo vjeru i čuvajmo zajednicu. Kakvo god današnje vrijeme bilo, koliko god nam se činilo da ima tame i mraka – mi posadimo svoju sadnicu, mi upalimo svoju svjeću doprinosa dobru i širenju ljepote islama.

Molim Milostivog da nam ukabuli naša dobra djela i oprostí naše grijehé.

Molim Gospodara da nam olakša da zadatke svog vremena ispunimo i da On, Gospodar svega, bude zadovoljan s nama. Amin!

Nezir ef. Špiodić, Helsingborg

.....



Vas poziva na

Jubilej - 20 GODINA DŽEMATA JÖNKÖPING


Vjerski i kulturni program

Naš dragi gost je




Prof. Seid ef. Eminović

29. marta 2015.g u 13.30h.

Sparvhöksgatan 1, Stadsgården Råslätt, Jönköping



Kontakt: info@bizja.se ili mobil 076 410 67 01. Molimo za prijavu ukoliko dolazite u većoj grupi.

U Sarajevu održan seminar za glavne imame iz dijaspore

Sarajevo, 25. februar 2015. (MINA) – U Sarajevu je jučer (24.02.2015.) održan stručni seminar za glavne imame Islamske zajednice iz bošnjačke dijaspore. Seminar je održan pod pokroviteljstvom Uprave za vanjske poslove i dijasporu uz saradnju sa Upravom za vjerska pitanja.



Moderator seminara je bio direktor Uprave za vjerska pitanja mr. Nusret Abdibegović, a predavači su bili akademik Enes Karić, doc.dr. Ahmet Alibašić i publicista Mufid Memija.

Teme su se ticale trenutne situacije u svijetu sa osvrtom na islam i muslimane te kako se nositi sa izazovima u zapadnom svijetu. Svoj doprinos ovom seminaru dali su zamjenik reisu-l-uleme mr. Husejin ef. Smajić, direktor uprave za vanjske poslove i dijasporu Razim ef. Čolić te rukovodilac odjela za dijasporu mr. Mirsad ef. Kalajdžić.

U drugom dijelu susreta glavnih imama bošnjačke dijaspore tretirano je, između ostalog, aktuelno stanje u zajednicama dijaspore, te pravilnik o radu džemata i krovnih organizacija u dijaspori i njegovo usklađivanje sa novim Ustavom IZ-e u BiH.

(www.rijaset.ba)

Svjetska muslimanska liga – Rabita

Mekkanski proglas

Izdat od strane

Svjetske islamske konferencije

Islam i borba protiv terorizma



Koju je organizovala Svjetska muslimanska liga – Rabita

Pod pokroviteljstvom Sluge dvaju časnih hramova

Kralja Selmana bin Abdul Aziz Al Sauda, Bog ga sačuvao

Mekka el-Mukerrema

03.- 06. Džumade-l-ula 1436. h.g.

22.-25. februar 2015. godine

U ime Allaha, Milostivog i Samilosnog

Hvala pripada Allahu, Gospodaru svjetova. Neka je blagoslov i mir na našeg Poslanika Muhammeda koji je poslan kao milost svjetovima, na Njegovu časnu porodicu i sve ashabe.

U Mekki, mjestu početka Objave i Poslanstva i prema kojem se svi muslimani u molitvi okreću, okupili su se islamski učenjaci i mislioci iz cijelog svijeta, odazivajući se na poziv Svjetske muslimanske lige – Rabite za učestvovanjem na svjetskoj konferenciji „Islam i borba protiv terorizma“, a koja se održala pod pokroviteljstvom Sluge dva časna hrama, kralja Selmana bin Abdul Aziza Al Sauda. Učesnici su se okupili kako bi raspravljali o terorizmu, pravilno ga definisali, identificirali njegove uzroke s ciljem zaštite Ummeta od njegovih štetnih posljedica. Ovi koraci su poduzeti nakon pojave ovog opasnog fenomena. Ugled islama je ukaljan, a prolivena je i krv nedužnih. Posljedice terorizma su dovele do podjela unutar muslimanskih zajednica. Ideološki trendovi i etnička podjela su uzeli maha, a neprijatelji Ummeta su se udružili s namjerom da nanesu štetu njegovom identitetu, jedinstvu i resursima.

U svjetlu neposredne opasnosti učenjaci su vođama ummeta, ulemi ummeta, medijima, muslimanskoj omladini i cijelom svijetu uputili ovaj Proglas kojeg čini pet poruka. Ovo je urađeno s namjerom da se ponudi savjet i pojasni istina te opravda odgovornost pred Allahom. Cilj ovog apela je osloboditi društvo od sadašnje bolne realnosti i iskazati pokornost Božijem poslaniku Muhammedu (a.s.), a u skladu s Njegovim riječima:

„Vjera je savjet! Vjera je savjet! Vjera je savjet!

Upitaše: Prema kome, Allahov poslanice? On je odgovorio: “Prema Allahu, Njegovoj knjizi, Njegovom Poslaniku, vođama muslimana i običnim ljudima.” [Hadis bilježi Muslim]

Prva poruka namjenjena muslimanskim liderima:

- § Da primjenjuju islamsko pravo (Šerijat), sprovedu sveobuhvatne reforme koje će postići pravdu, sačuvati dostojanstvo i potvrditi obaveze te ispuniti težnje naroda. Da obezbijede pristojan život uz sigurnu i odgovornu vladavinu.
- § Oni moraju održati jedinstvo Ummeta i suprotstaviti se svakom pokušaju njegove podjele koja se bazira na vjeri, sektaštvu i etničkoj pripadnosti. Također, dužni su promovisati solidarnost među muslimanima u svim njenim oblicima.
- § Da iskoriste materijalni i moralni potencijal nacije. Radi postizanja konsolidacije među islamskim zemljama, dužni su stati u kraj uništavanju ljudskih i prirodnih resursa.
- § Da bi se postigla umjerenost, dužni su revidirati obrazovne programe, kao i vjerske diskurse.
- § Sukobe moraju rješavati u skladu s Kur’anom i Sunnetom Muhammeda (a.s.). Moraju konstituirati Islamski Sud Pravde i spriječiti pokolje među muslimanima. Vlade islamskih zemalja dužne su spriječiti međumuslimanske sukobe inicirane različitim tumačenjima i shvatanjima vjere.
- § Nužno je da izrade sveobuhvatnu strategiju za prevenciju terorizma, za jačanje povjerenja između ummeta i lidera, za podršku legitimnim zahtjevima ummeta, za borbu protiv korupcije, za rješavanje problema nezaposlenosti i siromaštva, te zaštitu građanskih prava u svim segmentima društva.
- § Lideri moraju podržavati muslimanske manjine i štititi njihove interese. Njihov potencijal i sposobnosti treba se promovisati kako bi mogli izvršavati svoju misiju i ispunjavati obaveze prema svojim zajednicama. Te obaveze se moraju realizovati s umjerenošću u razumijevanju i praksi.
- § Nezavisnost vjerskih i pravosudnih institucija mora biti zagantovana.

Druga poruka namjenjena islamskim učenjacima:

- § S ciljem zaštite vjere i usmjeravanja ljudi trebaju očuvati identitet Ummeta putem neprestanog podučavanja i obrazovanja, svjesno uzimajući u obzir važnost sopstvene uloge pri pravilnom izvršavanju misije.
- § Islamski učenjaci moraju biti pozitivni uzori. Dužni su mudro savjetovati i usmjeravati Ummet i njegove lidere.
- § Dužni su ispraviti pogrešna shvatanja, zaštititi Ummet od sumnjivih, zbunjujućih i malicioznih trendova, zatim širiti pravilno razumijevanje vjere u skladu s temeljima islama i učenjem časnih prethodnika i imama četiri priznata mezheba, a koji su daleko od iskrivljenih tumačenja ekstremista kao i interpretacija neukih.
- § Moramo se dogovoriti oko osnovnih načela te se pridržavati istih. Oko svih pitanja potrebno je postići konsenzus. U slučaju neslaganja moramo biti ljubazni jedni prema drugima. S ciljem očuvanja najviših interesa Ummeta treba odbaciti jezik hereze, nazadnosti i tumačenjima neukih.
- § Potrebno je ojačati koordinaciju između vjerskih naučnih institucija s ciljem rješavanja novih pitanja putem izdavanja zajedničkih fetvi, te upozoravati na neutemeljene i nepravilne fetve.
- § Ulema mora raditi na jačanju veza sa omladinom, mora ispuniti prazninu kod omladine, raditi na proširenju njihovih vidika... ulema mora ponuditi adekvatne odgovore omladini, odgovore koji se temelje na principu uključivosti, vesatijje, odnosno miroljubivog i otvorenog pogleda na svijet.

Treća poruka namjenjena medijima u islamskom svijetu:

- § Naglašavati vjersko i nacionalno jedinstvo u muslimanskim društvima. Potrebno je ukazivati na pobunu i sektaštvo.
- § Mediji moraju uspostaviti islamske vrijednosti i etiku te zaustaviti širenje negativnih sadržaja koji su u suprotnosti s principima i vrijednostima Ummeta.
- § Mediji trebaju ispitati kredibilitet vijesti, njihovu autentičnost, te precizno izvještavati. Nužno je da se ograde od poruka u kojima se propagira terorizam te prepoznaju važnost poruke koja ide u svijet.
- § Mediji trebaju pomoći u liječenju rana ummeta, trebaju imati osjećaj odgovornosti za izgovorenu i napisanu riječ; izbjegavati širenje lažnih i krivo zavodljivih mišljenja.

Mediji trebaju raditi na širenju svijesti o pogubnosti prolijevanja krvi i prakticiranju nasilja, kao i na sprječavanju širenja lažnih tumačenja islama i prikazivanja muslimana na ružan način.

Četvrta poruka namjenjena omladini

- § Mladi se moraju čvrsto držati Allahove knjige (Kur'ana) i Sunneta. Moraju izbjegavati pozive na pobune, podjele i sukobe te nemar i pretjerivanja. Trebaju se pridržavati načela Šerijata, držati podalje od prolijevanja krvi nevinih i čuvati interese Ummeta.
- § Njihovo povjerenje u učenjake treba da bude nepokolebljivo, trebaju se ugledati na njih i poštovati njihove odluke. Omladina treba slijediti fetve učenjaka i upozoravati na one koji ih zloupotrebljavaju.
- § Omladina treba da razvija svoja znanja o vjeri, ojača svoje vjerovanje i poštuje vjerska pravila. Ne smije sebi dozvoliti da upada u zamke određenih grupacija čije poruke nemaju utemeljenja u Kur'anu i Sunnetu.
- § Omladina mora kontrolisati svoje emocije i uzeti u obzir posljedice svojih postupaka. Omladina mora shvatiti da se ciljevi postižu postupno prema općim normama života, koje je sam Bog Uzvišeni postavio, a koje se mogu naučiti iz povijesnog iskustva.

Peta poruka namjenjena cijelom svijetu:

- § Ekstremizam je globalni fenomen. Terorizam nije svojstven niti jednoj vjeri ni naciji. Dovodjenje islama u vezu s takvim optužbama smatra se neutemeljenim i zlonamjernim. Nasilje je u potpunosti odbačeno u Kur'anu, jer On predstavlja milost cijelom svijetu. Borba protiv svakog oblika nepravde je upravo ono o čemu Kur'an govori.
- § Vjerski ekstremizam predstavlja najvažniji uzrok terorizma jer navodi na nasilje.
- § Živimo u jednom svijetu u kojem naša društva koegzistiraju. Svi smo pogođeni s onim što se zbiva oko nas. Navedena činjenica zahtjeva naše učešće u izgradnji ljudske civilizacije s ciljem postizanja zajedničkih interesa.
- § Ljudske vrijednosti su zajedničke svima i njih ne smijemo mijenjati niti remetiti.
- § Borba protiv islama i promovisanje islamofobije predstavlja pogrešan način suprotstavljanja terorizmu i vjerskom fanatizmu.

§ Sloboda, sa svim svojim pravilima, jedna je od najviših vrijednosti islama, koju valja shvatiti i kao odgovornost, ona se ne smije zloupotrebjavati za nanošenje bola i patnje drugome, niti za vrijeđanje vjerskih simbola i svetinja. Zbog toga, trebamo saradivati na onim pitanjima oko kojih se slažemo, a ona oko kojih se razilazimo ne trebamo otvarati na način da vrijeđamo jedni druge.

§ Komunikacija i dijalog jesu način zblizavanja ljudi, a to je ujedno i potreba čovječanstva. Pokazivanje nadmoći jednih nad drugim i nanošenje patnje drugome se mora izbjegavati. Svako ima pravo da se ponosi svojim identitetom i javno ga izražava, ali bez ugrožavanja prava drugoga.

Djelujmo zajedno s ciljem iskorjenjivanja nepravde, nasilja, kolonizacije i dominacije. Vratimo prava obespravljenima i pokušajmo vratiti čast i ljudsko dostojanstvo koje nam je Allah (dž.š.) darovao. Allah u Svojoj knjizi kaže:

„Reci: “O sljedbenici Knjige, dođite da se okupimo oko jedne riječi i nama i vama zajedničke: da se nikome osim Allahu ne klanjamo, da nikoga Njemu ravnim ne smatramo i da jedni druge, pored Allaha, bogovima ne držimo!” Pa ako oni ne pristanu, vi recite: “Budite svjedoci da smo mi muslimani!”“ (Sura: Ali Imran, ajet: 64)

Uzvišeni Allah, također, kaže:

„O ljudi, Mi vas od jednog čovjeka i jedne žene stvaramo i na narode i plemena vas dijelimo da biste se upoznali. Najugledniji kod Allaha je onaj koji Ga se najviše boji, Allah, uistinu, sve zna i nije Mu skriveno ništa.“ (sura: al-Hudžurat, ajet: 13)

Neka je mir i blagoslov na našeg Poslanika Muhammed (a.s.), njegovu porodicu i ashabe.